



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

49. Kalenderwoche – ab 30. November 2008

Schbiel ohne Risigo

Nee, da had unsor Bundesbrässidend dähn Benkorn abor ma werglisch geheerisch de Le ffiddn gelähns! Das wern die sich merkn - bis zur nächsdn Gewinnausschiddung!

Un außor de Le ffiddnlähsung had dähr abor ooch dähn Benkorn noch ins Gewissn gereded! Se selldn widdor Bankjehs sein, keene Benkor! Bankjehs sinn serijeese Geschäftdsleide, die ooch e Haufn Geld machn dun, abor daderbei nisch das Geld von annre Leide vorzoggn dädn, haddor Bundesbrässidend gesachd..

Wobei ehm noch nisch genau rausgeforscht is, ob dor Mänsch schon n, wennor zu eim Bankjeh wern dud, odor erschd wennor Benkor wern dud, das Gewissn vorlierd. Odor - obors bloß nach hindn wegglabbn dud? Das is alles noch nisch rischdisch erforscht.

Jednfalls is bei Rendidde ibor finfunzwanzisch Brohzennd ooch bei Bankjehs kee Gewissn mähr beobachded wordn, was da sich irschendwie selbsdgridisch bemärgbar gemachd hamm däde.

Naja, was dud denne ooch eim Bankmänschn so e Gewissn nidzn? Da hasde doch de Börsnkurse, die ooch kee Gewissn hamm. Gewissn - das schdeerd doch bloß beim Geldscheffln!

Als Bankmennedschor bisde ja dann sowieso nisch mähr deem Gewissn voranwordlich, sondorn bloß noch dor Rendidde. Also, wenn de Rendidde scheen hoch is, da muss das Gewissn schweischn.

Das is abor nisch bloß bei de Bankmennedschor so. Das is bei alle Geschäfte so, wos eene

Rendidde gähm dud. Mid eenor scheen Rendidde kannsde werglisch jedes Gewissn zum Schweischn bring - ooch dei eischnes!

Bloß ehm... - wensde eenor bisd, so e kleenor Schluggor, dähr nirschendwo an de Rendidde nankomm dud, dann bleibsde ehm off deem Gewissn hoggn un mussd zuheern, was das dauornd rumzumeggorn had.

Dor Bundesbrässidend muss - sogesähn - die ganzn Bankmänschn irschendwie vorwechsld hamm. Dähr muss gedachd hamm, mid Redn lässt sich bei die was machn, weil dass se ehm noch e Gewissn hamm. Odor zumindestens gewisse Schburen dadervon!.

Das is ungefähr so, wie wensde denksd, dass de een Segsualschdrafdädor heiln dusd, wensde dähn off Freigang odor ganz loofn lässt.

Nee, das Redn nidzd nischd, weil keenor heern will. De Leide wern nu ma erschd im Schadensfall kluch. Erschd währ fiehlen dud, fängd an zu heern! Un mansche missn sich werglisch erschd rischdisch dähn Hindorn vorbrenn, bevor se offhaldn dun, zu raffn odor annersch beese zu sein. Das is so. Bei de Mänschn wie bei de Benkor un Bankjehs! Solange die immor widdor midm Geld rumschachern kenn, ohne dasse daderbei ooch ma selbor was vorliern kenn... - also, Hassard schbieln ohne Risigo... - da wern die nie offhaldn zu schbieln!

Eduard Sachsenmeyer